

四庫全書

集部

欽定四庫全書

集部

兩宋名賢小集卷三百

十八至
二十三

評校官中書臣閔恩毅

助教臣常循覆勘

總校官編修臣王燕緒

校對官編修臣曹錫齡

謄錄監生臣邵士鐸

欽定四庫全書

兩宋名賢小集卷三百十八

宋 陳思 編

元 陳世隆 補

靜佳乙稿

庚戌壽意一先生

江涵秋水碧潭潭飲馬單于不敢南宥密老臣功第一
緝熙天子歲登三身扶紫極星辰在手折黃封雨露甘

見說年來淮尾漲漢庭可要百曹參

反招隱

木末徑微微誰敲白板扉緩行松葉滑小摘藥苗稀山
色自今古塵寰多是非昂昂千歲鶴便肯傍人飛

太極圖

動靜無端畫一圈分明劈破又渾全日光漏得先天意
鑽入書窓箇箇圓

觀化

看見青蟲作蝶時不知蝶是此身非牀頭為有南華卷
午枕酣來忽夢飛

蝥

一蝥何唧唧吟落兒童心只在竹籬外篝燈無處尋

春晚有感

坐對吳山酒閒同越客吟月明人渡淺花暗鳥啼深往
事空流水還丹未化金不堪春又晚惆悵百年心

送僧蘋洲遊醉李

師今遊醉李自刺釣船篙地說三吳勝人夸二陸豪草
黃工女績波白課丁熬近海寒應早霜毛怯剃刀

有歎

與老本無期相尋天一涯履承雙足繭帽裏半頭絲路
近行猶歇鄉遙夢豈知酒酣增意氣忽憶少年時

子規

自身歸未得却勸別人歸思婦心中事征夫淚滿衣蜀
天知近遠江樹間稠稀幸自安雙翼誰教不奮飛

老將

不把瑀刀賣曾隨夜斫營老年猶善飯壯日想能兵上
馬身仍健看鴻眼更明戰多人不信枉指箭瘢呈

登眺

破帽任風吹天知髮已絲大江留禹蹟老樹見秦時北
際山如礪南溟水似池夜涼無夢到久矣歎吾衰

黎山廟

無處着詩名黎山萬古青人間留此像天上作何星祝

欽定四庫全書

兩宋名賢小集
卷三百十八

三

史祠神醉騷人謁夢醒當時青紫楦曾有許精靈

惜花

留春春不住春去落花隨枉自收殘片何堪綴舊枝輪
蹄前日約蜂蝶一年期代謝由來事誰能作許悲

桃源官罷芸居以唐詩拙作贈別

自作還相送唐詩結伴來歸裝攜此重笑口為君開蓮
上巢難穩桃邊艇却回空餘吟卷在沙鳥莫驚猜

元日

堂上聚周親相看又一春
吾年方覺老童子儼成人
婪尾屠蘇酒從頭鬱壘神
何須千歲上即此是新陳

昭慶寺

幽尋得勝趣城市幾人能
古柳深中磬長廊盡處燈
畫龍聽說法塑佛看齋僧
別寺經行遍茲遊昔未曾

苔溪

維舟古祠下野飯就魚羹
坐聽篙人說行逢牽路平
居民難問姓溪鴨自呼名
天目無由到泓洄更幾程

雪中僧虛舟來

雪中聞犬吠清卧起来遲開戶
千山白逢僧一個緇言
從風絮裏憶得雨花時
寒舍無祇待煎茶且說詩

湖蕩

雙橈入天影野葑綠全交
魚唼垂絲柳鷗眠折葉菱行
人沿岸曲落日挂林梢
歸去嚴城隔僧門尚可敲

六和塔

三百有餘年潮頭不敢顛
孤尖標白浪層級上青天
鈴

隔山僧唄燈通海客船
老來登眺眼不道步難前

題邱方仲月林

阿姊種婆娑秋風奈若何
人間千樹少天上一枝多
安得仙槎客攜將玉斧柯
和根都斫却還我舊山河

贈日者

烏兔走雙丸誰將手控搏
短長三萬日好醜百千般
數遠談何易天高問却難
送君尋富貴我命不中看

旅館

僕行方請息旅館復相招小市三家聚前村五里遙茅
柴侵熟飲松葉帶生燒猶有斜陽在行吟忽斷橋

嚴衢道中

草白三了路苔青五里牌長年車馬客幾兩利名鞋斗
糴隨時貴方言到處垂近山樵有主童稚拾松釵

舟到梅雨暴漲

夜月離于畢篙師可奈何帆穿風減半江闊雨添多側
岸無牽路中流有旋渦平生柁樓底得在柳梢過

對酒

莫信樵人說秦時有樹存青天浮渤海白日走崑崙為
有愁千斛時須酒一尊提壺亦相勸花下綠陰繁

客路

閨閣空相憶那知客路艱背人前去鳥迎面遠來山夜
泊孤燈悄晨裝片月寧猿聲不知處杳杳白雲間

送人之武昌

秋風吹落葉君作武昌遊只道從軍樂那知別路愁寒

欽定四庫全書

兩宋名賢小集
卷三百十八

暄楚岫色日夜漢江流大閩多珠履無為彈崩緹

舊遊

兩峯多少寺分日去遨遊山翠橫天目湖光浴佛頭花
朝騎馬醉月夜傍船謳一被微官縛重來不自由

挽芸居

不得來書久那知是古人近吟丞相喜往事諫官嗔身
死留名在堂空着影新平生聞笛感為此一沾巾

溪寺

背人沙鳥一行斜
喚客桐魚幾疊搗
誤向山中參白足
不知頭上着烏紗
煮茶烟暖浮新竹
洗鉢泉香帶落花
過夏功勞眠與食
誰能展卷看楞伽

暮春

姚黃魏紫惱人看
羅韞成塵俯仰間
蜀魄聲乾花有血
湘靈淚盡竹無斑
年光冉冉趨雙鬢
暮雨霏霏失四山
老裏情懷天地窄
莫教一日酒杯閒

少年遊

紫陌尋芳愛馬遲一春能得幾晴時
海棠露重衣全透楊柳風微帽半欹
大白引浮銀鑿落小紅吹徹玉參差
人生行樂須年少莫等星星滿鏡絲

次韻橋亭禊事

圯上還成集禊亭杉松自古草仍新
彩虹卧飲流杯水白鷺飛迎入座賓
俛仰已成今昔事東西更看往來人
聚蚊金谷皆安在若見吾徒合主臣

次庸齋先生韻贈黃隆中

醒眼隆中閱逝川
茅茨為屋竹為椽
吟成梁父時當隱
炊熟邯鄲客正眠
漢土一杯無處覓
白墳三尺有人憐
君歸欲作千年計
只合躬耕一寸田

聽白雲寺清師琴

古寺沈沈晝日長
泠然清響發僧房
昭君別去顏如玉
蘇武歸來髮已霜
山水無端言爾志
炭冰何事置吾腸
老來却愛虛簷外
雨滴梧桐一味涼

送李敬則之昇揚

江北江南一葉舟，憑將往事問東流。
錦帆月冷瓊花夜，綺閣風高玉樹秋。
杜牧三生開笑口，劉郎五絕掉吟頭。
淮山眼見詩人慣，高築詩壇汗漫遊。

次韻池上暮雨

濕遍闌干欲倚休，手中團扇漸知秋。
細聲合作簷間溜，大點漂成水面漚。
小小竹窻醒倦鶴，疎疎荷屋冷棲鷗。
漁翁蓑笠隨身在，立到黃昏釣未收。

書窻夏日

南風伊軋語窻扉團扇無功白日遲長恨老來方學易
自從春去不吟詩蟲絲有力縈琴索蛙粉無聲點墨池
偶出門前行數步石榴花過已多時

贈西蜀馮道士

峨眉山月照清溪中有方瞳一羽衣拄杖經行天下半
丹砂乞與世人稀千年城郭空歸鶴萬里山河自落暉
安得與君遊汗漫乘槎一問女星機

次韻李黃州江淮偉觀

檻前卷箔見晴峰夏口武昌西復東三國六朝襟帶地
孤城四水鼓鞞中女牆夜送淮山月老樹秋生夢澤風
君作此堂心萬里應憐世上少英雄

示醫卜逢松崖

我生八月十五夜清淺斜河浸月華顧兔擣殘千歲藥
牽牛引動半天槎自拋蓬海傳方處曾過成都賣卜家
今日相逢圓昨夢一杯松下醉流霞

陳令君增誠齋三三徑為十二徑次韻

四家三徑各風流，今古悠悠貉一邱。
拍甕新篔浮臘膩，繞堤老柳弄春柔。
日邊黃紙催人去，霞外青山聽鶴留。
若問西疇蓑笠事，合還陶令一孤舟。

次韻野水花朝之集

睡起名園百舌嬌，一年春事託今朝。
鞦韆庭院紅三徑，舴艋池塘綠半腰。
苔色染青吟屐蠟，花風吹暖敞裘貂。
主人自欠西湖債，管領風光是客邀。

和秋房題半湖樓二首

天目飛來第幾峰
峯前着屋貯虛空
濕雲低亞鉤闌角
缺月斜窺戶牖中
一水東西添柳岸
兩山南北欠樵風
住家欲作千年計
項刻陰晴便不同

四明仙客此樓居
畢竟西湖壓鑑湖
曾謂家童欺賀老
不如沙鶴認林逋
蒲根釣水知深淺
柳外行人乍有無
此景天公厭多取
只分一半與吾徒

栽松道者像

手便筇杖冷脚厭芒鞋
緊兩袖吹松風東岡復西嶺

吳歌

鴈影江潭底秋聲浦溆間吳兒歌一曲月子幾回彎

草蟲便面

蝶舞蜂歌倦蜻蜓看未休誰知織婦意方夏已思秋

意行橋

我行且奚適興盡忽自返倒影射清漪回光在橋板

塵外

塵飛不到處山色入芒屨乘興一長吟回頭已忘句

鴻

鴻飛九天。上人在平地。望塵土與青雲。其間能幾丈。

聽雪

瓦溝初瑟瑟。隱几坐虛白。良久却無聲。門前深幾尺。

東菑

東菑足時雨。離離半青黃。田家不待穫。小摘炊新香。

畫舫

畫舫茭中出。青山樹上斜。浪醒孤客酒。塵蓋萬人家。

溪村

欒柳正當官道漁舟偏繫柴門今年春水深淺看取層層岸痕

雨洗山光綠淨波涵天影清空草際自浮鵝鴨柳陰分坐兒童

漁翁

漁翁家在何許慣宿蘆花不歸昨夜江村欲雪百錢買得蓑衣

揚州

金陵王氣水東流
流到東淮古岸頭
夜半一聲天上曲
錦帆天子下揚州

七夕

兒女穿針夜向分
樓頭月落尚爐熏
憑誰為覓機邊石
留取支牀卧白雲

野望

帝青八萬四千里
更着修眉一兩尖
古往今來愁得盡

不教我輩送愁添

題李秋堂盟鷗集

相逢已恨十年遲
買酒湖山一夜詩
明日送春仍送客
柳花風颺鬢絲絲

航海

地角與天倪
茫茫何處期
星回析木次日
挂扶桑枝
沈石尋孤嶼
浮針辨四維
飄然一桴意
持此欲安之

橋西

雲澹風微日未低，瘦藤扶到小橋西。
花過雨相爭發，谷鳥無人自在啼。

淮客

長淮萬里秋風客，獨上高樓望秋色。
說與南人未必聽，神州只在闌干北。

調宜州冷官不赴

瘴海南邊路淺深，客愁不待嶺猿吟。
無人喚得涪翁起，分我桄榔橄欖陰。

辛亥二月望祭齋官因游甘園

山入湖光碧四圍
棋枰零落葑田稀
蒲芽短短鴛鴦冷
惟有漁師幾網歸

朝霏作雨連天濕
春氣熏人到骨香
四望水亭無正面
有花多處背湖光

海棠陰下小徘徊
屐齒深深一徑苔
忽聽銅鈺花外近
園丁說是主人來

老眼看花興未厭
不知頭上雨廉纖
流鶯浪語春風恨

誰拗花枝插帽簷

公事相妨一半春
今朝纔得自由身
眼中領畧能多少
細雨斜風便妬人

曉眺

鳥飛欲盡暮烟橫
一笛西風萬里晴
山外有山青不見
微雲映出却分明

次意一先生仙霞壁間韻

回首仙源隔彩霞
叢祠攫肉有饑鴉
正元朝士重來晚

不見桃花見菜花

宜春臺

是長沙定
王子築

定王米換長安土北望長安日幾回更有築臺歸未得
憑高却望定王臺

送李秋堂赴京口酒人

客懷正賴春相與苦欲留春天不許送君一舸下南徐
落花起舞流鶯語鮫人浴出扶桑繭天女染作紅雲段
君從何處得錦機借與人間為樣看青杏園深暖漏長

柳綿如雪撲酒缸
吳姬道字未端正
當壚學唱新番腔
貌貅百萬張
頤仰都將鐵甕盛
春釀有客高談四座傾
主人合坐諸侯上
日邊此別各南北
君頤始髭我衰白
何以贈之折柳條
千絲萬絲心搖搖

讀黃玉溪湯婆傳

君不見湯家阿泉驪
山陰出入宮掖承恩深
只留妃子脂粉氣
不暖少陵如鐵衾
又不見湯家阿池紫
塞上沈香霧擁將軍帳
天寒十指墮弓刀
底用空言如挾纊
何

如韓時老湯婆冬則飲湯惟腹皤形模混沌婦女笑閉
塞其免藏天和老生門前十日雪兩脚凍皴眠不得斷
無蠻素構心兵賴有婆兮相暖熱夫人竹氏青玲瓏矣
炎幾時奈秋風婆恥居下常熱中毋棄憔悴以禦冬得
黃太史五字詩厥孫傳之尤滑稽霜風蕭蕭歲年晚吾
喜湯婆有完傳

挽周伯弼

今日忽不樂散行湖水濱有懷天下士遽作夢中人醉

語驚天地狂歌哭鬼神九原如可贖那不百其身

贈續芸

誰謂芸居死餘香解返魂六丁將不去孤子續猶存科
斗三生債蟬魚再世冤向來詩作祟揮涕對人言

滄浪風月

我登滄浪亭復歌滄浪曲歌竟復長歌杳杳山水綠天
風吹散髮山月照濯足為謝獨醒人漁家酒初熟

有懷鷲山次僧芳庭韻

一塔與雲齊尋僧路不迷小舟沙鳥外疎磬夕陽西古
樹含雲亞春橋覆水低鷺峰飛不去夜夜子規啼

柳

臨水送將歸春風折贈時而今三丈樹元是手中枝

鷗

林魚秋江上鷗鳥來相隨蕩槳思驚起雲天碧四垂

天竺分韻得芳字

縹渺白雲鄉天風吹曉涼人尋水源至路入樹陰長晝

靜聞晴哢春餘拾澗芳
余心忽有得欲語又還忘

兩宋名賢小集卷三百十八

欽定四庫全書

兩宋名賢小集卷三百十九

宋 陳 思 編

元 陳世隆 補

抱拙小藁

趙希櫛字誼父汴人寶慶間頗著詩聲與河澤李龔相倡和龔甚推許之有抱拙小藁一卷

天屋歌為盧洪賦

霞扃雲牖高隆穹八荒四野垂簾櫳羲璘勃窣行西東
芒芒塵世如飛蓬玉川公子乘清風飄然據作吟詩宮
穿心出脅千萬語叫開閭闔驚蒼龍銀河瀉入北斗柄
醉來擲下琉璃鍾仙人王喬作鄰伍憑軒共笑噓長虹
旌陽拔宅想亦在千年萬歲都鴻濛君不見阿房結綺
今何許劫灰一丈漫秋雨

次韻李鶴田德真寄遠

長安日下浮雲生故人久作西南行
漚邊兩載音訊絕

鬢絲應與秋風爭蒼苔冉冉荒茅屋愁來忍把離騷讀
驚鴻剛自墮邊聲碧嶂那堪遮遠目青雲高處期翱翔
去人歲月今堂堂吳鉤拂拭霜雪冷龍光飛躍秋天涼
思君一夜離心折東樓又送無情月

道民金氏居

碧港雖通邑紅塵不到門桑麻唐杜曲雞犬晉桃源
遠雲千點天寬月一軒居人非隱者吾欲叫東園

竹閣

古寺因人重清風尚可尋斜陽明晚閣老竹暗秋林
兜率西歸久香山北望深登臨成感慨烟月獨知心

游臨平乾洞水洄

兩洞深如許神龍此莫居山空仙去久路險客來疎
風雨千崖暗雲烟四壁虛自措岩石蘚閒把姓名書

雪

不是春風柳因何絮客衫一雲同萬里半夜失千岩
征馬寒蹤印飢鳥凍吻緘江心一片白知有暮歸帆

送詩僧隆瘦岩

五載京華客山中坐得牢
禪心天竺石吟思浙江濤
入派名隨重游方步轉高
秋風吹錫遠相憶讀離騷

送自牧黃監鎮之官四安

桃花春浪急催上雪溪船
湖海稱佳士功名負壯年
政平民易感詩好客爭傳
別後加餐飯因風寄一箋

秋夕

霄虛白露溥木葉下危闌
月澹鐘聲曉燈青劍影寒
人

心山莽莽世事海漫漫何日塵氛淨西風望眼寬

中秋

白露溥空萬葉飛生香渾在桂花枝
一千里月正圓夜
九十日秋纔半時
湓浦風流元亮興
鄜州牢落少陵詩
不妨吟盡蟾蜍影
此別分明隔歲期

送李鶴田東遊後還鄉

劍倚梅花鶴夢醒
東遊吟骨帶秋清
台山路杳神仙跡
楚國書來母子情
半榻烟霞應有約
一筇風雪且兼程

丁寧及早催行李莫待西湖草色平

江湖偉觀

華屋巋然占上方一尊同此寄相羊
江湖拍隄春草長莽莽越山凝紫翠
搖搖蘇柳間青黃
歸鴻影裏闌干晚回首中州入渺茫

送譙岩趙日休歸蜀

烟塵渺渺暗魚鳧有客翩然赴上都
乞得玉宸新翰墨
要還琳宇舊規模十年蠲賦綸恩重
萬里歸程劍影孤

他日青城公案了紫雲深處勘陰符

春雪

飛下瑤天整復斜一番餘凍損芳華
荒荒月曉三千界
漠漠烟寒十萬家
柳外且疑先着絮
梅邊渾似後開花
東風吹作巴江水
浩蕩龍濤赴海涯

秋懷次韻

雨歇空階淨綠苔
西風涼氣滿樓臺
鴻飛遠渚知初至
燕別明年約早來
秋色祇今同世態
時文何意悞人才

停雲影裏頻搔首閒把新吟取次裁

春暮

薄薄寒侵酒面和可憐春事委流波兩堤楊柳東風老
一曲池塘夜雨多花落鶯聲還在否桑空蠶事又如何
壯心不逐流年去倚劍青天發浩歌

寄黃溪雲

十年成遠別幾度上高樓風遞江南信雲消渭北愁春
心驚海燕曉夢入溪鷗何日西窓燭相看說舊曾遊

九日懷友

江蟹初肥天欲霜
暮雲紅樹寫秋光
西風攜手登臨地
今日黃花兩處香

釣者

河豚荻筍春風老
鱸膾蓴絲秋水寒
多少侯門天樣闊
算來何似釣船寬

過臨平

市井蕭條景物非
居人猶號永和隄
春山十里斜陽樹

漠漠殘紅杜宇啼

吳道士釣雲

澹溪溪上一竿絲牽動閒雲片片飛折盡柳條穿不得
荷衣裹向碧山歸

次雪林李龔苔溪寄耒之韻

雲散烟收渺渺秋蛩聲四壁起新愁西風萬里乾坤眼
不到斜陽十二樓

風梧聲裏萬家秋一片吟心不着愁夜半酒醒銀燭冷

月移涼夢過西樓

賦墨雁圖分得宿雁

漠漠秋汀起晚烟
半欹寒影立風前
月明應有蘆花夢
飛遍江湖萬里天

次蕭水崖梅花韻

冰姿瓊骨淨無瑕
竹外溪邊處士家
若使牡丹開得早
有誰風雪看梅花

湧月僧樓

百尺闌干古櫟林
亂山如浪翠痕深
冰輪飛上光猶濕
照破西來一片心

秋夕

西風梳髮冷颼颼
半醉微吟獨倚樓
一片舊時南浦月
清光猶印別離愁

半枕小窓幽夢蝶
數聲何處寄書鴻
關山千里人歸晚
腸斷烟林一笛風

春遊

夢冷繁華金谷園春深葵麥暗朱門東風日日吹花急
紅雨蒼苔淚幾痕

蝶懶鶯暗欲暮春更無風雨別愁新天涯草色深如此
憶得淮南有故人

湖中曲

長眉柳葉交青條玉花嬌面垂雲髻湖波藍色春寥寥
大隄新曲干銀霄翠絲絡馬金裊騷香風隨步烟飛飄
芳亭深香傳金貂一笑嫣然輕百綃歡娛未了日晷短

城鼓伊伊續復斷鳴鞭夜月入雞關碧山皎皎水潺潺

春陰曲

東風吹寒雲九有凍龍迷海亂飛走雨脚斜拖入遥阜
碧草浮烟滿隄口春皇妙運造化手解使江山失妍醜
冷色禁持萬花柳紅紫未張春織愁愁春織心心呦呦
為花訴冤天聽否晴曦赫赫重陰剖夢裏桃源拚載酒

兩宋名賢小集卷三百十九

欽定四庫全書

兩宋名賢小集卷三百二十

宋 陳 思 編

元 陳世隆 補

學吟

朱南杰古徐人官監鎮攝華亭事往來吳松間所與
倡和俱一時知名者其詩似近樸直然率意處亦具
忘言自足之趣學吟藁一卷自跋云非敢言詩聊以

紀時固不止是惟錄其可以示人者

垂虹亭

憑虛蝮竦逼人寒中有危亭百尺寬
天接水腰呈絕境風回帆脚漲狂瀾
半篙落日吟將就一抹晴烟畫亦難
不是酒杯今日窄直須邀月上闌干

舟中過平江

蹤跡平生馬少游功名外物等虛舟
不多飲酒常成醉自在吟詩祇解愁
已幸一帆離錫邑更寬兩日到杭州

曉來忽見盤門塔疑是西湖大佛頭

楓橋灣酒家有楓橋千古壓波光之句用韻以紀
所見

楓橋酒味勝官坊隨分紅裙取次粧月照乍圓新氣象
僧閒不減舊風光一橫地勢橋分水兩岸人家競採桑
惟有塔鈴太多管笑人來往自玳瑁

出嘉興

舟出嘉禾五里城僧樓山塔互崢嶸酒旗密比隨風舞

漁網橫拖漾日晴畫舫貴人帆去穩翠衣遊女着來輕
山歌已接長河堰到得臨平月又明

過長河堰

帆指長河風力微漁舟箇箇有魚歸一聲水際笛三弄
幾處梅邊竹四圍桑伐遠揚蠶事熟花消濃豔柳綿飛
西河只在錢塘外又見孤山梅子肥

同劉朋山遊湖邊作

誰立西湖造化功峰分南北境相通四時風物經歌裡

兩岸人家圖畫中
堤柳送迎忘爾汝
棹聲來往自西東
風波便作恩波看
此樂君王與我同

同陳明叔遊湖作

四月湖邊冷若秋
先賢堂下繫扁舟
山頭積翠來新意
波面飄紅憶舊游
無奈楊花欺倦客
已多荷葉護輕舟
鷗邊誰道春歸了
猶有一聲黃栗留

和吳嘯岬韻

春回筆底露潛機
為怯高吟且遜肥
又見牛鞭春到日

羞披鷄結舊來衣雪隨着處分單厚梅不關人自密稀
歸計商量今始定樂哉心事看雲飛

春日呈嘯峒

朝來慚愧又逢春總把官身換客身堤柳未歸新氣象
窻梅猶帶舊精神村居牢落誰沾我吏醉清閒却笑人
打疊故書排日去一尊隨意踏芳塵

南園不與昔時同綿亘規模十里通萬石倚山如踞虎
一亭跨水似垂虹虛堂舊占梅邊月曲徑新添竹外風

詩料滿前吟不盡主人尊酒未應空

壽實齋侍郎王先生

崧高維嶽誦生申整頓乾坤屬舊臣天下安危關出處
性中存養自真純便歸紫橐酬公論已草黃麻授正人
天為皇家錫難老願將霖雨福斯民

七夕呈坐間諸友時留平江宿和靖書院次日

葉已鳴秋夜漸長年年織女會牛郎龍梭暫歇七襄駕
雲袖輕飄百和香輸我晚涼和月飲任渠明發渡河忙

要知工巧原無用，樂得身閒拙不妨。

和吳梅庵同登白龍對月韻

秋容滿目帶微寒，帆穩蘭舟駕碧瀾。
照我湖光天共色，襲人花氣露初乾。
笑談紅袖日中舞，驚動蒼龍水底蟠。
最是一清無着處，却慚狼籍草杯盤。

餞徐衍道知縣

事業文章屬當家，刃游餘地宰金沙。
挽回凶歲作豐稔，安集流民絕嘆嗟。
兩載秋霜威盜賊，一犁春雨沃桑麻。

寬民實意言難盡勝種河陽滿縣花

餞海鹽史後樂

秦溪邑大號難治後樂三年以德為海澗有樓還舊觀
堂深無日不新詩虛舟祇載來時物實惠常教去後思
相業真傳公不忝蒼生況是望霖時

朱知鎮戎服警盜不憚雪夜酒庫在鎮外不得與
戲呈

戎裝元不礙儒冠盜賊潛窺膽自寒金鼓聲聞三里外

旌旗影庇四民安肯從協力多君子愧不同盟是酒官
和氣釀成年可卜曉來喜見雪漫漫

除夜懷劉朋山為坑司幹官

失脚糟邱又一春歲除牢落頗關情誰家不換桃符句
比屋相聞爆竹聲舊友未知能鑄冶新年宜入孰陶成
來朝無甚人交往樂得齁齁睡到明

夜坐書懷

挑燈看徹後村詩忽爾憧憧有所思不待人言知己錯

要知分定盍如斯但求甘旨安無事浪說榮華自有時
倒指新筍當已熟且煨鬪芋一中之

曉發嘉興府

曉發嘉興府人家門未開聞關船側過水漲堰平推濃
綠暗官柳肥紅綻野梅城中簫鼓發知是使君回

舟過吳江縣

寺滿吳江縣鐘聲兩岸分買魚嫌少室沽酒欠文君平
地橋邊浪無心嶺外雲篙人添德色為策過湖勳

泊崇德

堰未抵長河先從古縣過
詩舟尋舊岸酒市鬻新歌
傍水人家密依山僧寺多
夷猶觀未足無奈月明何

東新橋值雪

間關入帝鄉飛雪斷羈腸
天地皆明白山川忽老蒼
柳眉遮舊影梅額上新粧
客裏急先務河邊問老航

甲辰入京春深猶雪和吳嘯峒二首

歲事客裏過今年祇去年
甘貧長寂寂知己孰拳拳
花

豔卑崇幃江流美祖鞭家山芳意動野騎盍言還
掀髯論時事莫問是邪非綠句池邊得青陽柳外歸夜
深嫌薄酒春淺怯單衣門巷雪撩亂低頭且掩扉

富民犯米四十字以喻之

彼此有人心人心即訟庭初無深利害倒自費調停私
意生荆棘公家有典刑落便宜是益座右可刊銘

孤山觀梅

費盡年年造化功精神全在雪霜中一枝映帶窻前月

消得逋仙作主翁

陳梅隱求詩

早歲走江湖那堪又歲除
隱梅非活計行李盍寧居
自有珠璣集不攜朝貢書
酬君無好語索笑謾躊躇

林竹翁求跋

何物耐交情林翁竹借名
霜寒不改操風動鎮長清
袖裡森珠玉胷中富甲兵
江湖莫相笑已播逸民聲

書考

戊申春

人說宦途好元來是險途不親真利害難話細工夫下
考初書一中心有愧無官卑何展布三載且糊塗

劉直孺示拙逸詩編且命着語

拙是愚中來逸與怠相比限界固分明差忒亦容易人
心自有機天下本無事更參大學章終始一誠意

尹樓岩留華亭

風雷昨夜揭窻紗未信樓岩不憶家和靖山頭春未了
莫因尋鶴負梅花

攝事華亭歸舟口占

挈來司市正花時
補陋支傾費品題
顧影自慙身是客
片帆又逐曉風西

延陵道中即事三絕

筍輿取道自吳干
東作村村喜一般
已拜勸農田畷賜
舊租何似放令寬

人家密簇近溪旁
舊袂青裙競採桑
相喚相呼相嘆息
繭絲歲歲為官忙

小立青帘賣酒家味雖薄薄勝空茶今年春滿疎籬外
數點輕紅出杏花

題吳梅庵和靖索句圖

童寒鶴冷雪霏霏正是先生得句時一段孤清圖不盡
梅花從此厭人詩

入京

客懷醉殺也醒醒昨夜思家夢幾驚道阻且長無信息
只將喜鵲驗安平

橫林遇雨

斷當篙師到錫山片雲尼我竹林間短篷展轉渾無寐
祇聽郵鈴去復還

雨濕桅竿風颭帆不禁篷漏滴衣單蒼頭更說無眠處
始信人生行路難

自鎮入庫十二里皆山徑邢侯以馬相招道間口
占問梅

蹇驢突兀萬山間欲雨還晴雪又慳一路梅花尋不見

多應開向小溪彎

烟雨樓

錦繡初開城角東規模綿亘境相通
一亭舊占梅邊月
兩徑新添竹外風
山色有無烟變態
湖光濃淡雨收功
凭闌正好催歸去
橫笛數聲蘆葦中

兩宋名賢小集卷三百二十

欽定四庫全書

兩宋名賢小集卷三百二十一

宋 陳思 編

元 陳世隆 補

臞翁詩集

教陶孫字器之號臞翁長樂人淳熙庚子貢入太學
慶元間韓侂胄用事丞相趙汝愚以謫死陶孫作甲
寅行以哀之醉中題三元樓壁侂胄知遣人昇壁去

捕陶孫甚急遂逃匿江湖間佐胄事敗復出登嘉定
間進士授通州海門簿教授漳州辟酒所幹官歷奉
議郎主管華州西嶽卒年七十四有臞翁集二卷

以入定大士太乙真人像送莞晦叔

真人與大士蘭菊而異芳坐卧得定力銅眼鐵脊梁是
中有佳趣山海俱茫茫或時現神妙塵蹟生怪光云何
得此本有僧吳下狂飲酒不計斗褚無一絲藏興來高
閉門落筆如追亡走送臞菴室洗心一爐香盤陀旃林

閣枕藉玉井涼蒙頭帔古遮眼經論長不知幾陵谷
睡穩坐不僵君家定吉夢二士相迎將辟除寒具油靜
展垂中堂會當同一龕寒泉薦空觴夜窓搖茶烟駝褐
依繩牀楊枝灑寥閒藜杖輝森芒與君六根靜讀書到

虞唐

寄福清翅山舅陳夢寔

路岐引人不作長野梅官柳禪風光看山看水入詩眼
歲月不覺髮眉蒼請從丈人開肺腸身非石人忘故鄉

五年江湖枕書睡夢隨南雲落翁堂亦知行坐歌白頭
池南隱几浴鳧雙鰕孤肯復有羈旅石塘破寺魂悲涼
毛錐不補萬事裂存者各在天一方善和里第知幾易
遼東城郭空相望平生何用酷似舅政似嫫母顰施媻
兒時拊頭祝文章祇今未入崔蔡行三年一書願見貫
骨肉滿縣愁難當屋頭茶糜定過墻滿窓日色文書香
眼前欠甥頗念否我亦口挂蠓山旁煩將歸意示泉石
小待錦衣漫俗粧

送林伯農還鹿角山

今我不樂遊四方夙昔已具浮海航十年點化鷗心性
一生正坐虎文章海山未必盡佳處往與蜚子收漁梁
夢中了了說吳楚山川如掌今羊腸讀書南鄰索檳榔
原頭汙邪豚酒香何時攝衣上公堂蛤蜊含漿魚尾黃
客從南來勤寄將

洗竹簡諸公同賦

舍東修竹密如櫛一日洗淨清風來脫巾解帶坐寒碧

置觴露飲始此廻平林遠靄開圖畫西望羣山如過馬
詩翁意落帆影外孤村結廬對瀟灑百年奇事笑談成
向來無此蒼龍聲閒身一笑直錢萬剡粉剡青留姓名

用韻謝竹主人陳元仰

戴巾襪纔令我汗日暮佳人期不來陳郎揖人不下榻
青山白雲喚得廻手閒十畝蕭郎畫箇裏何妨繫吾馬
食單得涼清可啜毳褐分陰翠如灑搖金戛玉真天成
夢搥風前茶臼聲一川窈窕荷萬柄野翁得此甘辭名

竹間新闢一地可坐十客用前韻刻竹上

竹君得姓起何代渭川鼻祖茲雲來主人好事富千埒
日報平安知幾迴平生好山仍好畫意匠經營學盤馬
別裁斗地規摩圍自汲清池行播灑一杯壽君三徑成
請君靜聽風來聲醉眠煮得石根爛以次平章身與名

謝葉司理徐知縣見貽之什

二公乞
入社

書生自是鑽簡蠹淨業還從竹背來新詩細字行茂密
驚蛇起草盤蛟迴是身政欠虎頭畫望山氣如還樞馬

翛然君子六千人不受湘靈清淚灑竹林定交業已成
北窓讀書吟唔聲金魚玉帶不汝却社中未厭山王名

一日復一日

一日復一日來如赴海波今晨我無糧未卜晡夕過辛
苦幸一飽知復有明何平生實愚闇慮淺憂則多雀鼠
偷太倉田野蜚螟蛾至尊高旰食邊防望投戈我欲瀝
血訴官府多譴呵進退羝觸藩屈鬱鵬在羅壯心一不
遂六龍奄蹉跎所以憂世人散髮歸巖阿長生儻可學

吾其駐羲娥

放船

柳邊放船試南風
陽溪荷花能豔紅
一川雲錦步不盡
我舟正在繁香中
午天無雲青脈脈
枕舷哀歌醉脫幘
更將綠葉穿碧筒
欲臣屈卮奴大白
風前一笑玉塵橫
蜻蜓側翅潛魚驚
騎馬貴人多內熱
此歡勿語長安城
須臾客醉船亦醉
信流一抹西村外
翁媪負牆樵牧奔
拾薪供茶初不記
還家鼻息撼四鄰
閭風接夢疑非真

清游何時記三人臞菴與弟拙鄉陳

次韻謝李秘校

常州無錫縣詩人

大雅熄自鄧續絃久無人中間翰墨場名字俱已湮江
山亦何助東海真揚塵我笑李夫子餅無半合陳人書
兩俱亡何用語逼真作詩來起予欲卜二仲鄰依然送
鴻目衮衮天機新莫欺鬢眉蒼持護應有神狗鬚侯舞
陽羝角相平津皇天信平分萬物各得春但願閱世心
孤特凜箭筠日者鶴飛書江漢起隱淪三物論鄉國六

藝程成均秋風入帝閑錯落騅駟驎君曾讀詔否却枕
方欠仲勿驚作詩面酒顚吹微鱗唾手澆衰陋一返姚
姒純稽古不無力政復昌其身他時玉堂夢與問三生
因盟我良不難欲託孫子親贄君以黃耳附書莫辭頻
再拜賦斷章水石俱磷磷

此韻字義見詩
晉揚之水箋

次韻馮孔武雪中簡聞人薄乞炭

君不見朱門煌煌多近臣豹胎煮麋蠟為薪庭中盛設
潑寒戲炙手欲近還嗔人誰知曝背茅簷下欲獻要是

山林真兒童抑搔皮肉軟日輪過中方欠伸懸鵲結駟
兩相笑百年俱成一窖塵先生自是冷官樣要看入火
紅麒麟撫鬚自作詠雪句秘思早與相如親蒲團擁裘
結僧坐別有絺綌君南鄰願迴六龍照后土施與萬國
無邊春屑瓊鏤玉入肺腑拍手一笑未吾貧

乞炭於馮孔武再用前韻

君不見元光河決愁從臣天子有詔皆負薪當時實炭
知幾畚下與魚鼈爭生人孰知木黔善制水火出木盡

全其真一朝入火縱粉骨曲身得暖龍蛇伸成虧等作
萬世計肯與番僧推却塵我欲詆諧與作傳上繼毛穎
追獲麟日燒崑崙十挺指惜哉黔也非我親窮朝破竈
鬱烟燼青唇黑腕羞比鄰誰能輿致送煖熱坐使有脚
歌陽春將軍羔酒空作夢十年未有今年貧

思古人

思古人思古人古人曠曠若日月我欲剖棺斲出古人
心惟見蒼苔漫白骨請陳古人心君勿駭客言古人惟

一真可使風俗皆還淳殺雞不及林宗炊黍不候龐公
雪中安道興適盡坐上公榮尊已空呼酒徑勸君欲眠
即遣客嵇康巨源不為絕戴崇彭宣本相得徐庶失老
母密如元德不能奪之臣嚴陵薄宦情狎如丈叔不能
止之客包胥伍員不失其為友羊祜陸抗不害其為敵
我有蒸壺安事隱語我但食韭安用多種割肉元知方
朔真拏金豈即劉義勇古人心事有如此何至顏色相
媚奉道衰憐仁義世亂生姦雄君知臧否不挂口正慮

匕首堪其胸我生恐無用我死知無聞作書預與兒輩
訣葬時定覓要離墳

贈墨工陳伯升

古墨法變今百年雪齋乃能幻神藥杜又膚清衛玠神
眼明再見老陳作墨如人意隨短長用之不盡渠解笑
須君筆端馭龍蛇他日始信入木妙

僕以紹熙壬子中夏二十五日始躋風篁討龍井
遂至廣福謁三賢像閱舊碑追觀一代風流為賦

此詩適月林依公留設茗供因書以遺之他日能
為我揭詩板於壁間使示來者亦山之一助也

龍井寺有辯才師趙
清獻蘇文忠塑像

奇石爛橫道茲山信多姿江湖醜兩股一泓乃孤危相
傳龍所家或恐神護持腥風轉灑霽對陰崖立淋漓惜無
緯蕭勇探此抱寶癡山僧作層障慘淡生幽思何為金
錯影顛倒眩俗兒坐來百念失蒼官導前馳招提果深
登屐痕恍前期咄哉少肉山著此高顛師端能致遨頭

絕唱相娛嬉過溪亦何事相送了不疑渠能縛禪律因
來數鬚眉我愛秦郎記字壓頭陀碑月林只夜夜人物
自一時賢愚盡蟻封來者吾得知

佳人珮明月贈俞德章

佳人珮明月笑語含春姿手握幽蘭叢照影清漢湄少
年冶遊子行樂方及時折荅戲相贈玉色頰自持歸來
種白壁日漚文錦絲加幣欲聘君常恐歲月遲終然不
可諧翕剡聽所之願言遺鄉澤遠慰千里思

六月內喜雨詩

時寓崑山縣東禪寺西齋

炎天亦靳雨特地費雷將隱隱來何久飛飛勢稍颺初
從霑塊潤忽作建瓴忙穉子拋書出臞禪解縛狂苗滋
應秀穎風過忽溫涼蛛網掀三面蟲書漫數行衾箱開
歲事恩澤到詩章怨暑移今昨煩疴覺在亡青蓮開紺
宇白苧舞雕牆隻影還晡暮驚心重渺茫思惟大火聚
迴向六時香脫畧時流輩周旋古佛場身才六丈足舌
乃大千長此理憑誰詰何方更舉揚鼠愁燈崛壁鷓睨

鐵琅璫生理何聊賴斯文重激昂盛時追少壯故步失
尋常政爾蓬心夢依然貝葉光

再次徐先輩二首

淺聞懲闕漏小學到凡將始制初龍遁流風漸鳥颺
今緗帙富益我手抄忙半世真書癖衰年忽酒狂壯懷
邀汗漫奇服問厖涼身許羲皇上名卑崔蔡行知心履
幾兩闕計木千章湖海堪流滯陳劉略喪亡每思辭北
闕直欲老東墻度嶺官憔悴藏山計杳茫尚方何日鳥

侍女幾時香斂板予行役懷鉛子舉場翅垂雖一背腹
果自三長孰使多為累還成少不揚忽驚投暗壁曾是
獻明璫閱世肱三折論文首一昂結歡慚季札抗對敢
元常他日聯詩社前羞李杜光

身是韓康伯名慚許子將居然屯澤閑何得巽風颺憶
昔求詩甚端成刻燭忙出喉真自苦舞手或成狂楊柳
偏歌雨葡萄肯博涼羣兒哀齒舊諸武讓顏行禹穴魚
龍陳天門虎豹章陰符空獨佩秘論未應亡自築揚雄

宅誰窺宋玉墻鄉英殊磊磊俗物自茫茫
被厲三精劍寧神百蘊香諾交那復社
取醉莫論場高節看徐穉妍詞伏仲長
泥蟠雖汨沒鞬掣會飛揚列屋多齊趙
華糧間壁墻從渠誇富豔試與校低昂
邱喙徒三尺公才可百常素交風雨盡
雪涕魯靈光

畢叔茲可掃園賞牡丹

衣冠塞繁都茂苑非夙昔雙鋪俯行渠
文簡相公宅是家固多賢滿篋載春秋
中有數畝園頗復修風流新亭

著高穩佳木行清幽客來必置醴井蛙挾其輶張燈看
落花意作長門愁小却得一欣凍壁纏蛟虬先朝補天
手翰墨皆共游再拜閱帝書局促虞褚歐平生實好古
兩武布九州恍然駕閭風坐我曲池頭竹間是茶烟松
風助颼颼梅實亦登盤按行感良儔樾馬喧午枕土毛
擷晨羞似聞屋東偏萬指食鋤耰行當賣書籍買鄰託
羊求與公行灌園第一營瓜疇

四月二十三日始設酒禁試東坡羹一杯其味甚

真覺麴蘖中殊無寸功也食已得三詩

今日忽感悟閉門謝麴生未危却二孺不戰仇三彭培
擊北海尊濟量東坡羹尚恨薄滋味未能免虧成我欲
燕元和默坐朝上京坐待梨棗熟小試昇天行

評詩要平淡此語吾不然大千自有舌何用長短篇謂
是天送句端正落我前旋聞口吻鳴頗益心腸煎少陵
耽句佳欲以一死捐是中有真意靖節羞獨賢

去夏苦多雨勢若無炎官今晨迫重午香黍仍膠去聲盤

天機杳難測人言亦多端祇今原上田立苗未妨寒但
願舍穎時借日開迷漫蟪蛄爾何知煦煦啼夜闌

兩宋名賢小集卷三百二十一

欽定四庫全書

兩宋名賢小集卷三百二十二

宋 陳思 編

元 陳世隆 補

臞翁詩集

改周晉仙贈丁相士之什

張顛許我以神仙薛顛謂予可英傑丁生謂二俱無成
世間那得此奇崛麒麟閣上森貂蟬龍虎鼎內飛大丹

腰錢跨鶴誰不願只有圯下先吾鞭何如吳松江上佳
門橫釣車屋農具卧看蒼虬擾白雲正午堂堂拔江去
奉寄旌德尉劉申之

諸劉兄弟賢一一無可選竹林銳頭郎風味吾小阮平
生天機深善閉得內健邇來卿何曹不辨折腰本稍傳
詩語東朝日照蘭畹伊余戰紛華心旆凡幾偃劃逢君
家語雋永初一鸞識遺飽新得友勝悟夙損緬懷歌商
地蕭瑟松磴遠陰陰蕪菁花碧蝶相與晚是中着高士

物意自偃蹇向來白衣宰雲壑論補袞優游濟艱難如
以禹代絲劉郎秀眉宇秋隼立高巘端能謝師匠萬卷
自鉏墾時須閱世諦一及城門鍵功名頭上簪日月風
中慙何時會吳下春動長洲苑

送王郎

洽

車輪何由方草色欲無路晴川媚雙燕及此送將去若
人天機深奇服雅自與色溫無可飾語妙時一吐相逢
大江上為我浣塵土後期豈前料已作千歲語告歸何

草草雙水深霧雨稍聞父老舊門戶要渠補祗愁樸櫟
地與世作誇詡寧當去樓梯閉置吾叔度翼翼吳齊門
大江流日夜別君雖咫尺即是風牛馬君才何如我我
拙猶肯借淮人買繡絲布洲市如赭張皇十日飲著公
喬松下畫工亦豈學愛玩此粲者人情勿苦拒輿馬幸
整暇向來三宿戀取別萬里駕想當雙玉瓶酣歌淚盈
把縹緲鴻鵠去吾甘老原野

次韻張長公寵賜初度致禱之語

何人著書補獲麟竹汗未乾頭已星天上風流張公子
散髮滄浪歌獨醒威名徧滿淮草木肯借妙語春冥靈
臞翁之腹無三壬平時貯書纔一丁泥塗斷道學龜曳
雲天潑眼慙鸞停亦知封侯下曹掾寧與阿堵高寧馨
夢從諸兒坐家塾十年燈火寒青熒分無黃色明天庭
獨倚一片藏無形虞翻骨相當自程曲江風度乃不名

上閩帥范石湖五首

人物于今正渺然欲從江表訪先賢邇來耆舊無新色

誰使文章漫兩川
利器早能誇穎脫
偏師聊復制中權
騷人有幾登青竹
耐可同時欠執鞭

今代論文更是非
賞音誰復得牙夔
真從長慶成編日
便到先生晚歲詩
萬馬蕭蕭閒律令
孤峯隱隱出旌旗
了知長短三千首
收拾餘師即我師

丁年口伐真奇事
一代詩鳴不救貧
大手欲推浯水頌
羣酋曾折石湖巾
乃今謝傳還初志
其奈王陽是故人
獨有吾閩欠公句
詔書果起釣磻濱

此行閩嶠吾能數行盡天南未了青莫倚看山韜墨本
要須入界挾圖經西湖楊柳雲生鏡東阜離支錦作屏
欲託翁冰烏石篆請公作屋與新銘

蚤知吳下多名士身許先生嫡子行他日畧容追李杜
斯文何敢望班揚向來流水孤三奏此去飛霞乞一翔
牛鐸調宮吾豈敢噓濡萬一借聲光

代人壽度支郎中李嘉言

李下老人龍作儔談經閱世無春秋一朝函谷占紫氣

萬里西極行青牛青蓮居士亦其裔太白淪精來謁帝
江東狂客漏神機一號謫仙人得制天人驚世時一斑
文采風流有遠孫百年斗酒真細事郡有德政朝功言
晉陵坐嘯列城祖一札細書風九土為郎不用漢山錢
度支事煩通會府向來供億寬艱虞祇今笏畫通材須
裕農足國端有道判花視草皆夷途金魚玉帶公所有
太夫人高松栢壽綵衣板輿堪作圖翬扇閩州陳母後
人間盛事省見稀王母一笑攘桃兒花明柳暗白日靜

鶯穿燕颺青春遲請君酌此西湖水萬歲千秋佐天子
清明寒食數日間謹勿拋擲為佳耳

登蘇臺用袁憲韻贈兩趙提幹

汝積幼聞

勝賞多從暇日遠眼中朋友欲星稀退休不復思三顧
能賦猶堪廣七依遊鹿臺前空逝水栖烏曲裏只斜暉
書生懷古真癡絕看盡閒雲入棟飛

次韻萍鄉文叔章訪別

力田望逢年倚市勝刺繡十年邱里語失火要自掬君

行半天下何處得者舊請從老龐說龍鳳相赴湊全家
隱鹿門遺安不求富常時拜牀下大鐘盡徐叩男兒唯
一身用在百歲後譬如營屋室宗廟先庫廩不聞買山
隱而有居巷陋君看鐘鼎家梁肉或墨瘦寧為賣文活
一經老學究出身即九折時命乃大繆向來尸裹草口
語困逗留居然齒編貝月粟供賃儻何知山澗底鹿豕
對飯糗文章忌隨人謹勿誇客右書林無淺植筆未有
深耨紛紛青紫植後進渠領袖結交兩任助設客一陰

就卑官慚處贈俚語致公壽

高郵因師葡萄蘆雁秋瓜三種

漢家士馬知多少
晚得蒲萄繞院栽
何物支郎能伎倆
龍鬚馬乳應時來

蒲萄

莫話淒涼塞北秋
銜蘆避弋使人愁
與君細展江南畫

水宿沙眠得自由

蘆雁

子母鈎牽曉露溥
行人渴暑慰艱難
青門種色今餘箇

莫作黃臺秋盡看

秋瓜

用香字遺李恭叔

我無令君三日香瘦鶴為軀龜作腸薄寒中人曳兩絰
獨吟猗那遺我將憶從兩脚萬里回政坐羣兒相謗傷
竭來一見老柱史城郭落落歸靈光安得與君壽六龍
探借千歲北斗漿却乘斑蚪訪月窟盡斫惡樹無留藏
天風泠泠吹珮環洞視碧落豁四旁下方應奉正三八
閒置可憐青瑣窻

再用晨吐字韻寄潘德久

舍人賓日姿起居庭燎晨豈惟瑞朝廷薦紳日多聞就
如田甲嘲死灰果不然那知碩果剝中有一捻仁稽古
得微酬櫛具我進賢琴為悲風彈茶必活水煎平生轉
菴詩小當壽千年忽聞朔方騷更欲腰黃間向來撲朔
豪日者今華顛

下客時覘君車茵陽醉吐萬事君不理傳聞拒開戶雖
然臭味合更覺心貌古書讎嶧山棗羹臙首陽苦坐令
府西門平輿平說二許君當我輿臺銀艾心已灰尚有

西山緣共待石髓開神仙覺易與詩句端難裁却後五
百年化鶴吾獨來

酬答李學長

海門縣學有三忠堂陳了翁任
伯雨龔夬兩簿解負墻甚邇

夫子焉不學高朕羅三賢橫前一片石教外皆別傳三
虎誰最怒未覺相後先渠伊囊中方貴在後者鞭我家
一佛堂盜背知廟堧憶昨祠上丁蕢燭初欲燃諸生氣
清明人如出雲泉洗爵俯象鼻掩豆高豚肩朱絃張文
王繁聲斥師延此時識方屢綦滿青苔錢李公獨鳳儀

衆中得何堅，惜無補天手。轉之上細氈，朝來食盤中。穉
蕨初數拳，蒼蒼本難測。何由願真筌，自我得此士。可以
一當千，如聞縫掖姿。欲重世所捐，春容吐握詩。法用春
秋全，酬贈無玉案。三復緇衣篇。

大風懷林伯農

江湖易高風，六月寒廩廩。中宵會急雨，涼意到衾枕。顛
披蒲葦亂，抑壓烏鳶噤。禾頭欲生耳，樹背各流瀋。不謂
晡來霞橫拖，半天錦初疑。鴉翻晴旋覺，虹投飲晦明。信

難料暘霽吾誰論所思隔江水筆力望徐沈十年一葛
衣肘見尚整衽想當風雨夕憂國願歲稔淒涼新豐邸
避濕幾違寢何由語連牀共破秋風凜

醉歌贈鄒孝忠

老鄒草檄如吹律能令陰谷回陽春手提赤心獻天子
布衫麻鞋驚市人戈船上噓五里霧詔發內府捐金銀
進賢冠者不好武歸來結屋看濤雲却回孤憤與江浪
氣壓千人萬人將或時飲就夷門屠亦有槌糝漁陽唱

埋名袖手君得辭行宮今在江之湄高帝遊魂正思沛
太王有道聊居岐一杯屬君當起舞能令公喜令公怒
粹摩青山鬪兩虎搜攪中流鵝鸛語平生未受噲等伍
圖中褒鄂爾如許六十小劫敵運去老上單于公手取

次韻張宰牡丹

羯鼓勿罷弄吾琴無成虧潘桃既無賴陶柳自不持造
物有鑪錘攬之杜拾遺卷簾出傾城一笑不用帷輸心
巧當面珍重來如期人為曲江秀花自潛溪移美人欲

晞紅鏡中覩東施如聞姚魏風紅紫合折枝常恐研光
帽半倒金屈卮作詩苦留春出吻竟不奇但當闋幽間
屬賦歌載馳殷勤禪靈錦丈尺餘邱遲公杯當再行雉
邊多小兒

上鄭參政四十韻

乙亥

吾閩天下選人傑聖時蕃佐戴高前牒承家裕後昆海
門當劍立洋嶼焱鵬騫氣色來迴互耆明有討論蟠胃
三萬卷落筆五千言地芥垂頭拾天瓢信手翻餘陰潤

桑梓賸馥到蘭蓀白日騏驎坂青春桃李園揚鬢方澤
國插羽已天閣伊昔昌能諫于今弘獨尊夙驚山有虎
已驗鹿隨幡帶草書籤麗金華講舌存履聲仍獨上驛
置愈爭奔有客迷途甚勞公倒屣煩請先陳失馬次第
說投猿漳水頭堪白融峯淚幾吞嵌嵌辭故里觚角見
修門到遞吳蠶宿留交楚雁番忽通狂客刺俄返獨縲
魂望祿蒲生節隨人柳折圈天高難發口地縮會移跟
一昨哄堂暇深知納牖思印剞聊小靳緼束更能溫日

者叨堂貼時哉會氣元敢言矜驥裏復自妬嬋媛末學
應須授羣經剩欲繙恐因鱣發發復作兔爰爰光範寬
無闕階符紫有垣極知專造化稍許展寒暄國論圖南
紀邊防議北轅未將蝨火畀忍使彗旗燭天步曾留跼
皇心重改幡房奩非久秘藥籠會深掀豆棧能忘秣櫛
材儻入掄略容偷廩稍重議洗乾坤舉邑多狷犬深心
寓祝狔老身難矍鑠疾眼久眵昏合浦珠無脛豐城劍
有痕事多慚蹇叔議敢及臧孫餘日知安在南村定北

村

體齋詩為梁谿馮季求作

口腹不自主來吟體齋詩三肅齋中人安體安措辭體
卑語近拘體高語近欺耳目口鼻形人各師其師要之
天地間當以一理推馮侯好兄弟一一清廟姿是家好
談道脫畧毛與皮一當春悋悋詩禮相娛嬉但媿遠客
塵泥子連理枝雖然參自訣要知不磷緇我車得國工
分路有險夷君知魯叟聖妙在物不遺當其作春秋一

字如權錘越境惜趙盾斷謂此語非俗儒無已心望道
如隔紕閉門畫圓方用世多參差千載堪一咍汝足未
及巖馮郎顧我笑坐久爐烟遲黃花粲墻東青山轉墻
西吾言亦已費須君浮一卮

予客崑山得薦巖長老時道人散朗閒遠不交人
事心甚敬之今來海上復得悟公老成疎練能言
吳中山水人物甚詳東軒種竹如雲不問其人可
知也一日忽起故山之想予語悟野田荒草在處

愁人心目安能復作瀉山之牛乎因作一詩言君子出處之大致以告不知者

平生庾公塵可浣通州泥竭來海門上日瘦氣慘悽春風有相導佚我以闍闈前身定聞法夢作三生猊悟公癡鈍禪迎客忽虎溪招要得半席紙帳春繒綿東軒養蒼雲大似開昔迷計程南山北託宿東院西絕憐維摩牀而置法喜妻是身於虛空了不礙角圭四大師本無客亦何所攜頗聞弁山隅髯松作兒啼山神喝連聲已

受三十筮豈知為山牛未知靶與犁去來同一雲未覺
道理睽幸勿使竹歸留與老鳳棲鑿齒恐無對後期當

啞齋

兩宋名賢小集卷三百二十二

欽定四庫全書

兩宋名賢小集卷三百二十三

宋 陳 思 編

元 陳世隆 補

張泗州集

張公庠字元善皇祐元年進士有泗州集

郡齋宴坐

為州容散誕真慰野人情撼膝禪初悟搖頭句未成試

香秋院靜鬪墨午窓明已有東歸計柴扉掩姓名

晚春途中

一年春事又成空擁鼻微吟半醉中
夾路桃花風雨過馬蹄無處避殘紅

宮詞

曉霧溟濛似有無半殘紅燭動金鋪
黃鶯不語梨花上錯認徐熙舊畫圖

四部韶音進玉卮千官傾望柘黃衣
舞頭再拜金階遠

畫鼓連催卷隊歸

二月猶寒未有雷
江梅纔謝小桃開
宮娥不放珠簾下
待得東風送燕來

盡道今來花信遲
凌晨宮女探春歸
寒梅一朵金盤小
已有清香拂御衣

過苑中官排辦時
江梅初綻兩三枝
春寒呵手晨粧罷
簾外人催送駕遲

再坐千官花滿頭
御香煙上紫雲樓
萬人同向青霄望

鼓笛聲中度彩毬

後苑宸遊炎日長
宮中強半坐迴廊
鷓鴣瀟瀟銀塘靜
楊柳梧桐水殿香

萬字闌干菊半開
更憐清露點莓苔
仙韶使副呈新譜
得旨重陽侍宴來

清旦宮中候上番
銀潢輕淡玉鈎殘
山茶破萼江梅發
盡倚朱闌不避寒

上番宮女捲簾時
閃閃寒鴉拂曉啼
纔着赭袍催進輦

紫宸門外報班齊

銀漢橫斜近建章九重深靜閉蘭房
六更未覺晨光動自是仙家日月長

萱草初長花未開共知青帝領春回
珠簾捲上瓊鈎穩不礙薰風滿殿來

太皞祠壇數級紅青旂搖曳日朦朧
人間未覺東風至先入宜春小苑中

西苑春深奉翠華朱闌千萬護珍葩
不如直上紅樓去

盡見瓊林十里花


碧瓦鴛鴦勢欲飛
禁門深靜日遲遲
玉簫吹遍新傳譜
坐着黃鸝數換枝

月華浮動上階稜
侍宴歸來掩繡屏
子夜酒醒蘭燭暗
碧紗窗外度流螢

宴起昭陽索輦時
爐香偏上赭黃衣
金門玉砌明如晝
宮女三千把燭歸

夾城西畔半毬場
彩仗彎彎人對行
一樣驂騑三百匹

金羈更伴綠遊韉



兩宋名賢小集卷三百二十三

欽定四庫全書

集部

兩宋名賢小集卷三百二十四至七

詳校官中書臣閔思毅

助教臣常循覆勘

總校官編修臣王燕緒

校對官助教臣汪錫魁

謄錄監生臣朱思

欽定四庫全書

兩宋名賢小集卷三百二十四

宋 陳思編

元 陳世隆補

看雲小集

黃文雷字希聲盱江人有看雲小集

讀史感興

人為五行精二氣相循環陽明發天秀隱約趨龍蟠如

何椒蘭芳苦厄蕭艾繁良玉必火浴利刃因嵐剗大鈞
雖無垠嶽降亦甚難

空山有大木琅玕葉敷腴未至更摧落豈復潤朽株東
西四百載天明拱黃圖哀哀李杜死諸賢亦淪胥庸蜀
及初燃大厦終難扶長懷追爽鳩誰復來此居

典午固薄德南風扇羣污癡兒各翻覆血刃起相屠老
羝作人語海上生羊魚山東二百州白日紛逃遁更擅
年代足文皇受乾符秦少否則長豈亦天意歟

斷鼇幾何年八極儼不動當是有樞紐鐵網落織空偷
兒睨斗柄赤手掣天棟愁殺地上人覆壓萬古痛書生
見事淺十算九不中豈徒書生罪要與六籍共

子雲譏神仙仙人輕薄俗軒冕既非榮刀鋸况多辱惟
能小萬物是以超五欲栖瓊得輕安鏤玉記華馥一詠
太始音靈芝悟前夙山謫未可遺裁書繫鶴足

仙栖固多名世但知蓬萊九州復九州廣大莫可該翩
翩牧鶴童巧笑如嬰孩授我紫元章歸路玉笛哀蒼寒

不可覓但有清風來
徧反寧久居浮生多塵埃

和陶

志士方進身恨不以羽飛
束縛歸山岡竟為人所悲
白揚夜蕭蕭顧此何足依
百歲會有盡智愚同所歸
奈此後之人未老形已衰
有酒不暇飲而恐心事違
林表有宿靄谷鳥相啾喧
聽此心煩勞啟窓西南偏
天氣總未佳白雲生隴山
欲訪雲門人雨至或未還
撥灰書且住首肯心中言

黃河一再清似是上古時風雅久已降後來無文辭清
風日淪落世道皆如茲工華不工實此話我所疑文章
有心印昔人端不欺但恨智者少吾亦少卑之

上有碧松林下有白石道中有學仙人自號古松老蛻
身千歲餘坐息如木橋面目劇嚴冷但道空虛好袖出
天甲書意色輕鴻寶此老誠可人吾欲從師表

牧牛上陽坡角掛上下經吳童歌且謠旨趣皆混成東
西兩山間飽見日月更歸來松陰涼夕陽滿前庭黃葉

從風翻蕭颯草際鳴再拜謝天公賦此小人情

次陳剛父見簡韻

我居深山中細哦求友篇邂逅潮海濱得此壁一聯山
立古先民期君能拍肩茫茫宇宙心楚楚東南賢讀書
知姓名心死非貌敬昭回不在山中天揭西柄空山三
水搨綠滿風雨徑歲寒無忘我細意匡山詠呦呦革野
春我友二三子歸山睡初足澗壑秋風起一瓣無盡香
黃雲繞書几別吟極雋永形魂清九耳

玉壺即事

雨過條風著柳芽
淡黃淺綠嫩如花
陂湖漾漾初侵路
蜂蝶紛紛各理家
帶郾園林仙苑近
送春船舫繡簾遮
芸窓倦倚何山翠
暖靄輕籠日脚斜

自廣

今古紛紛孰控搏
太平方寸豁憂端
後千年去人何似
外九州來天自寬
風雨南山飛霹靂
江湖北斗掛闌干
要知元命真消息
滄海神龍自屈蟠

近報

入春風雨惡情懷談柄誰資近報來比歲時聞通國信
新年又說建行臺難言鐵冶飛灰燼易見銅駝出草萊
羌管夜吹梅落盡倚牆撩亂野花開

青青塞草始知春又見平林棗頰頰地起天津流枉矢
鳥飛淮甸覆行塵漆城按堵寧辭蔭石馬沾溝會有神
千古淮陽無處覓不知藏質是何人

歲晚歸自臨川

半世生羣盜窮年見亂離出門偏念母挾策欲干誰雪
重人蹤絕山寒火氣低平時來往地滿目盡憂疑

無恙

北去初無恙傳疑路不通戈鋌亭障密榜牘訓辭工落
日鳥飛急空山花自紅若為能詛盜桑已斗星中

題醉僧圖

僧之飲酒地獄咫尺此僧飲酒天龍辟易僧之飲酒背
面抵諱此僧飲酒口角威沸披毛帶角即不理倒堦卧

路而已矣一生般若幾杯湯箇是逃禪真法子不憂兜
率不著渠只憂兜率無酒沽臨行自謗不羞恥至今留
與人畫圖畫圖得龍眠畫形兼畫意君看阿堵中如如
元不死是卧是死誰得知手中尚記攜鴟夷翻河倒海
不救渴安得餘瀝留于斯我觀此僧面孔真滑稽醉中
定解草聖并賦詩當其幕天席地時惜無人以筆墨隨
紛紛散聖今何為賴有一醉留其奇君不見夜雨閉門
難學柳下惠又不見背水置陣古來惟有韓將軍

南紀

南紀霑王澤涵濡已百年故應逢小劫何得怨蒼天舊
觀寧無日浮生自可憐永懷千古事感慨淚漣漣

南豐道中五首

此縣聞天下披圖且萬家螭頭餘佛屋鹿角卧江沙好
與蘇凋瘵誰令息歎嗟春風多少意殘竹映松花

此亦勸農者畬田半入雲龍蛇因爾雜玉石故難分日
月無私照江山未返魂茅茨倦行李何自戒重門

此路通南國于今人少行遺民依廟住曠野用鋤耕古
木刀痕熟空山鬼火驚猶聞宿師處倉猝又招兵

想見承平日茲為富庶鄉門庭存位置井臼隔垣墻草
市宜區種空村又夕陽誰歟真致此盜賊已天亡

大村三百輩同此就天誅銳欲取禾耳那知暴骨乎雲
疑鵝鸛陣風想虎狼都掩骼行春令母令長媚狐

曉行

一水來不極兩山青欲連夜雨瀑初漲曉行路難緣此

寧有人跡四顧風竹喧渡橋復何歸倚崖挑初然

晚立

獨游得荒溪晚意與心會水聲遠纔聞山色靜可對鳥
語林塘邊犬吠籬落外柴門未須關月在東峯背

古石

長沙郡齋

貝頭扇窓前石參差類虎螭秋時蘚可剝歲晏竹相宜要
自山川至那知陵谷移摩挲羣玉瘦風助馬王悲

石頭懷古

長江日浩浩，跂予望淮南。禹畫足廣輪，王氣分殺函。朝市一以建，燔踞誠匪慚。中躔風塵擾，六龍此停驂。衣冠幸有地，喙息賴未殲。豈惟時賢力，要是天險參。頗聞京洛墟，不救狐兔饞。厭道故有道，往悔寧非貪。前登石頭路，得共北客譚。新秋帶歸鴻，落日隨征帆。弔古意未厭，鼓鐘已酣酣。

金陵卽事

東菴遺像宿塵埃，追想雞聲午夢回。只與鍾山增九鼎。

當時何似早歸來

千年陳迹故難尋
向北山根識定林
丘壑獨來差可意
斷無人影古松陰

唐晉諸人骨已磨
龍蟠虎踞自山河
可憐不共羊曇見
奈此秦淮落照何

王謝風流自一時
長千古巷記烏衣
尋常百姓幾番換
那有當年燕子飛

西城圖

大哉天地間品類不可齊誰為好事人貌此西城西松
花瑣碎沙草肥是間可牧羊千蹄可憐羣鹿正走險或
爾剝割衣其皮啜湏樹樺尚有理穴顛插齒吁何為吾
聞中原全盛時重譯萬里朝京師懷方象胥飭乃事幻
人詭伎傳雕題煌煌烈祖鑒古作宅京營洛分漕伊太
行以南孟門左其間氣象何雄奇豈知一旦盡荆棘荒
城落日羣狐啼吁嗟東都尚如此玉門之外那得知還
君此圖雙涕洟願賦周官王會詩

二喬圖

翔龍下卷江東土孫郎初得喬家女喬家本自重曹瞞
隻雞斗酒空酸楚衿情正用留阿瑜尚得人間稱肺腑
百年王氣竟銷沈妙寫丹青嬌欲語香閨搗管寄何書
並蒂芙蓉按花譜那知不是未嫁時本末無從勘前史
詞人多事管閒愁銅雀紛紛底歌舞儘強被髮向黃壚
只與東阿傳洛浦

昭君行

自石季倫始賦昭君曲以後作者浸多不容措手每
恨沿襲之悞作漢初和親意著脉非也又按竟寧元
年呼韓邪既婿漢氏其年五月宮車晏駕矣因併正
之不惟祛詞人之失亦以解昭君于地下云

君不見未央前殿羅九賓漢皇南面呼韓臣無人作歌
繼大雅至今遺恨悲昭君內殿春閒鬪馮傳掖庭新花
隔煙霧票姚狂奪燕支山玉顏竟上羶車去人生流落
那得知不應畫史嫌蛾眉癡心只恐琵琶語歸夢空隨

鴻雁飛穹廬隨分薄梳洗世間禍福還相倚上流厭人
能幾時後來燕啄皇孫死野狐落中高臺傾宮人斜邊
曲時平千秋萬歲總如此誰似青塚年年青

次黃存之東臯韻

藝木東臯下新榮渭水涯錦機分箔開青子亞枝斜攢
角初生筍龍鬚正引瓜汲清雙玉井留客品嘗茶

抱膝東臯下春風又草廬海仙將可見溪友未宜踈楷
著祈年疏閒箋種樹書西山頽煙雨容易長嘉蔬

負耒東臯下溝塍稻秫分汗邪爭一溉臺笠事重耘
雅春稱壽秦謠歲勞動無功虛作傳農績未如君

挾冊東臯下從人笑未玄傳真秧馬帖參透牧牛篇列
岫窓前月平湖塢外煙似蒙稽古力鍾鼎豈其然

冬郊

冬郊見初晴空林夕陽軟歸牛無人驅欲涉行轉緩新
霽明雪山更喜鵲爭喚絕勝門外人流冗及歲亂

楚語
歲晏

為亂

送故

履霜著餘悲送故或古風幸會草木長土脉驗隱隆共
惟青鳥仙倘亦知吾窮落日起秀色軍峯在雲中

上天池寺

蟠際均衡嶽千峯獨出羣鯤鵬從水擊翼軫驗天文曠
野風行雨層霄日貫雲僧言興廢事因念福王勲
始從平地望宛在九霄中不意身能到平生心併空江
淮通好雨日月會剛風三伏涼如水蟠拏想白龍

今古無窮恨山林只自豪雲行地欲盡風立天相高靈
草如堪餌浮生計可逃人間何擾擾萬里一秋毫

往年因讀岳王傳嘗為之賦今過東林睹其遺象
感而申頌之

將軍英爽冠人豪眼底山河累寶刀青女護香天亦悞
黑龍飲渭數何逃當時僧說松楸犯今日人推闕閱高
珍重王孫方鼎貴莫將歌舞替征袍

欲壞長城豈自由江人重唱白符鳩熏天富貴還須盡

從古忠良類若仇獄吏但能書牘背相公休欲割鴻溝
書生志念閒無用長想朱雲地下游

長歌

君不見游塵著空生九州人在中間懸兩眸揚花化萍
無根蒂風消水長東西流江南下濕人易老過盡歲年
還草草長留日照人間榆柳浮生轉枯槁毬紋帶遶千
花黃青娥攢眉眉細長莫言一尊千萬壽乃翁身命
屬渠手長安城中鬼笑人水底紙錢能不朽今人不見

古人心古人不見今人事天上若無長生人即是古人
都盡死金鳧銀雁滿江湖神光夜夜開黃壚年經月緯
三百卷平生欲作何人書古人云去留不得我些古人
三太息今人莫詫山石牢更後十年人不識

觀化

屋角有蜘蛛結網大如箕有來者蜻蜓飛飛墮其圍嗟
汝水之生爬沙自足嬉忽然凌空游蜂蠆避路馳一朝
嬰禍羅羽翼安所施蜘蛛雖未出狼狽已可期我欲救

起汝正坐手足疲噫吁噉悲弗悲蜘蛛亦有黃雀隨百
蟲相殘人不管人兮食人天豈知

挽程孺人

汪起潛內

有煒遵彤管無嫌各紫樞清心能敏悟雅性謝驕舒奉
語期鸞彩傳經囑鳳雛妙年仙格迅琬琰不勝書

兩宋名賢小集卷三百二十四